

續

藏

書

續藏書卷十六目錄

經濟名臣

尚書王恭毅公槩

尚書陳康懿公俊

都御史黃公紱

太子太保項襄毅公忠

太保余肅敏公子俊

附徐廷璋 馬文升

都御史韓襄毅公雍

布政陶公魯齋公

太子少保程襄毅公信

侍郎葉文莊公盛

太師馬端肅公文升

少保秦襄毅公紘

太子少保鄧襄毅公廷瓚

附 朱英

太子少保童公軒

尚書何文肅公喬新

都御史高公明

續藏書卷十六目錄終

續藏書卷之十六

經濟名臣

尚書王恭毅公

事

裕陵

茂陵

公名傑字同節廬陵人正統七年進士初授刑部主事歷陞員外郎郎中屢遷河南按察使所至案無留牘獄無冤詞天順初被誣下獄會襄憲王入朝上問所過官吏賢否王對曰臣過河南百姓遮道訴王廉使冤且言王廉使清勁鋤豪拊善有恩有威殿下幸爲百姓奏皇帝還我王廉使上喜立命法

司雪公還任尋陞右副都御史巡撫陝西設法救荒全活數萬人流徙歸業天順七年還大理卿出入十年凡兩法司及畿藩讞奏叅錯情法多所平反時吏諳律比者類多深刻公獨持明允濟以長厚諸所審駁會文切理倫要簡暢轉相傳錄類成卷籍成化八年遷刑部尚書商文毅薦代姚文敏吏部主議者不喜南人竟用尹同仁十年卒謚恭毅子臣成化五年進士翰林侍講廣西叅政

尚書陳康懿公

事

裕陵

茂陵

公名俊字時英莆田人正統十三年進士歷官戶部
征秋青草天津諸衛公言舊負未蠲新額湊積人不
能堪詔減三十五萬束天順五年兩廣合兵討叛
蠻公假便宜勅督軍興內艱起復明年蠻平解兵始
得奔喪成化元年以戶部郎中陞南京太常少卿四
年召爲戶部右侍郎公練習錢穀凡四方災傷邊鎮
請芻粟爲裁盈縮條析利害曲折七年京師大饑勅
公出太倉米百萬斛賑糴公禁絕射利者請石以上

閉不與八年虜入河套兵出公督餉上便宜乞內帑
助邊除徑道發丁飛輓軍興不乏榆林大捷進俸一
等明年改吏部十三年侍郎九載陞南京戶部尚書
歷吏兵二部又九載請老公孝友廉慎沉毅簡質南
曹務閑唯戶部金錢布穀出納與內外諸司相關多
撓沮不可盡如法公一按典則制國用省財不啻數
十萬卒謚康懿

都御史黃公

事

裕陵

景帝

茂陵

公名紱字用章封丘人曾祖思豫事孝陵掌太常

事以罪編氓沅州又徙戍平越公以故爲平越諸生

舉雲南正統十三年進士行人歷南刑部郎中爲人

廉直遇事颺發卽重忤時貴不恤人或笑黃郎中呆

公正色抗言不爲移沮亦竟以是得名譚千戶者大

猾任俠結懽貴顯人嘗奪民蘆塲萬畝貴顯人業與

譚千戶酒食往來卽知民枉不能直公竟盡法直蘆

塲歸民歷四川叅議叅政右布政使叅政時過崇慶

忽旋風起奇與前公曰卽有冤且散吾爲若理風遂止
抵州沐而禱於城隍夢中若有神言州西寺云云公
密訪州西四十里有寺當孔道倚山爲巢公旦起率
吏兵急抵寺盡繫諸僧諸僧中一人少而狀甚獐惡
詰之無祠牒卽塗醋聖額上曬洗之隱有巾痕公曰
是盜也卽訊諸僧不能隱盡得其奸狀蓋寺西有巨
塘夜殺投宿人沉塘中衆共分其囊貲有妻女則又
分其妻女匿妻女隱窖中恣淫毒久矣公盡按律殺
僧毀其寺倉吏倚王親侵沒官糧萬計王曲庇倉吏

公竟按如法。公爲錢穀吏。精律比。輒能發摘奸伏。威行川中。青神令聞風解印綬去。右使時奏。閉建昌礦。爲左使湖廣。妖僧繼曉至。公曰。繼曉以妖術。故不離上左右。今且得罪。雖名掃墓。實逸賊。檄武昌府館之。後堂好飲食。無令得出入。俄事敗。檻送京師。伏誅。副都御史巡撫延綏。劾叅將郭鏞等。擒豪奸張綱。公行道。望見川中飲馬婦。片布遮下體。俯首歎息曰。令健兒貧至此。我何面目臨其上乎。亟令豫出餉三月。邊健兒素貧苦。而延綏特甚。大臣名爲巡撫。健兒雖凍。

系濟名臣
餓死不問延綏人忠朴聞公歎人人感泣願出死力
爲黃都堂一戰已爲尚書戶部威稜截然盡革財賦
內外諸積弊改左都御史入臺天下仰望其風采公
戇直崖異常忤人自恐伏禍不可測請老去未幾卒

太子太保項襄毅公

事

裕陵
茂陵

景帝

公名忠字蓋臣嘉興人正統七年進士爲刑部主事
陞員外郎扈上北征得走還漸陞廣東按察副使
天順三年陞陝西按察使內艱陝人數千里赴闕乞
留乃奪服還任及徵入爲大理卿陝人復詣闕乞留
改右副都御史陝西巡撫成化元年虜入延綏公及
寧遠伯擊虜遁去明年又與彰武伯破虜四年固原
土達滿四叛據石城遠近戒嚴勅公總督軍務將
兵往討時伏羌伯毛忠戰歿我軍遽退公卽陣斬指

新漢書卷一百一十五
○揮以狗陣始定移兵據賊水草困賊兵部恐賊來乘
請詔問公當濟師否公不請濟師進與賊相持百
日賊稍急公隨二卒單騎抵賊寨曉以禍福諸脅從
賊日相率來降賊有愛將楊虎狸者被我擒公叱令
斫頭來虎狸伏地乞宥死自效公卽假以詞色許令
立功解金鈎束賜虎狸遣去故滿四竟爲虎狸所誘
擒凡斬首七千六百俘獲無筭公因陳四事爲經久
計是時兵事急訛言洶洶公督軍矢石雨下無懼色
嘗歎曰奉命討賊久無功甘心效死矣鈞陽服公勇

毅狗國召還仍協理院事故馬端肅公每語人曰土
達驚猛關中根本四未平時朝野洶洶使其得志天
下事未可知也項公畢竭心力露宿原野者六十餘
日躬冒矢石者二十餘戰始克獲醜獻馘殄平巨寇
而止進一階較諸趙輔劉聚王越封拜如寄者不無
功懋賞薄之疑矣六年大旱荆襄流民咸遁入山李
鬍子者劉千斤黨也倡流民爲亂復勅公出總督
軍務公遣人持榜入山諭降卽負險不服縱兵擒勦
不赦凡遣還鄉者四十餘萬編戍者萬餘俘斬二千

因上便宜十事。詔暫留撫治。進左都御史。會有星孛天田。言官因論荆襄妄殺。公再疏自列。乞歸。不許。八年。又討平野王剛。小王洪。召還院。荆襄以公處置得宜。三十餘年。賊不起。而議者猶指公妄殺。致干天和。交章論奏。故公辯疏略曰。臣忠肅將天威。克平逋寇。不意媚疾流言。仰瀆宸聽。今廷臣之所指。兵科之所糾。兵部之所叅駁。大率謂臣以流寓良民作盜。賊俘獻京。以無罪編民作從賊。謫戍邊。以久居僑民作無藉。逐還鄉。至謂祛殺慘酷。甚于夷狄。彗出旱傷。

皆臣所致。又謂奏報與功冊級數不符。不宜陞賞。臣若不辯。何由自明。竊唯荆襄自劉千斤石和尚王彪就擒而後。有李鬚子王洪。燃燼煽禍。千百成羣。遠近荼毒。今臣奉命總師。與李震等督兵悉捕。僅俘百餘詣京。皆首惡也。科臣乃謂盡良家子。而法司聽其翻異。不知前巡撫楊璿叅將王信等屢奏猖獗難禦者誰邪。其餘賊黨不忍濫誅。簡其丁壯。謫發邊戍。而家屬從之。非無罪者。流民附籍。百無一二。如光化縣陳長于籍。雖有之。然占山四十餘里。招聚無賴一千餘。

衆爭鬪劫殺無日無之。可以久居之。故不遣乎。若非
近山州縣。則固仍其附籍。而未嘗遣也。臣始因嘯聚
揭榜諭之。謂荆襄山中已殺數千。蓋張虛聲。怵之。使
解散耳。彼時原屬烏有。今計殺傷囚繫死者。實不過
千較。昨討劉千斤擒殺至數十萬者。何如哉。科臣乃
謂憐于夷狄。而致慧出旱傷。亦誠厚誣矣。軍中報捷
初未及詳。斬獲的數。每多冒濫。其後核功定籍。百不
存一。雖擒李鬍子王洪輩。以將士爭邀首功。臣皆革
去不錄。如功少報多。敢曰無弊。今報止一百二十餘

級反加參駁奚以服人且兵部尚書白圭亦嘗親蒞此地親任此事矣今日之舉乃圭往日之遺患也若以今日之功不宜陞賞則往擒劉千斤尚遺後患而得高擢厚賞者盍亦少思乎今臣已遣回流民一百五十餘萬謫戍賊黨一萬二百有奇隨居家屬五萬九千餘四省境內帖然安矣先時中外皆慮荆襄禍患何日得寧今旣平靖而流言沸騰反以臣爲口實昔馬援征南蒙薏苡之謫鄧艾伐蜀來檻車之徵非唯功不見錄反致身且不保今幸遭聖明不加罪

譴伏乞投閒。賜臣致仕。奏入。帝曰。荆襄事已成功。雖有浮言。朕皆不聽。今覽卿奏。事理益明。卿何嫌何疑。遽告退避。所辭不允。十年。代王槩爲刑部尚書。十一年。爲兵部尚書。代白圭。公以職方最屬要樞。卽調劉忠宣公大夏。陸文量。公容爲郎。時有錦衣百戶韋瑛者。挾汪直爲訶察。屢興大獄。擅執京朝官。中外重足。莫敢正言。公發憤草疏。約吏部尚書尹旻諸公。卿發直瑛奸罪。或先漏言於直。而尹旻又先送疏。草與直幸。上明聖大怒。罷直。瑛戍邊。而直見上獨。

泣言此內臣黃賜陳祖生中傷奴御史戴縉因而言
直奉法無他以迎 上意故 上復令直照舊領廠
直遂首誣公下廷訊事本起於千戶吳綬綬在楚軍
中撓法公急奏取回因而附直用事構公公廷辯落
職去久之諸奸次第敗乃復公兵部尚書致仕劉忠
宣曰公平土達流賊功較諸臣爲最而官未延世奈
何此可以見公道矣初直用事諸大臣耻與往來已
而一二大臣首結直於是商文毅公首乞去都御史
李賓刑部尚書董方戶部薛遠兵部侍郎程萬里繼

去翁世資代遠余子俊代公公家居二十六年卒贈
太子太保謚襄毅皆馬鈞陽諸公之力也公明果倜
儻曉暢軍務直言正色不屑詭隨子綬孫錫舉進士
綬爲江西叅政錫爲南光祿卿錫兄鏞以公功世蘇
州衛指揮錫子治元嘉靖丙辰進士

逸史氏曰韓雍罷二廣五載而卒項忠先雍舉進士
至弘治初猶無恙給事御史交薦不起八十餘乃卒
俱謚襄毅也

年譜曰禿堅子留公牧馬于沙場公胡服挾所牧二

良馬乘之間道走望斗而南越四日夜馬疲乃棄馬
潛步忽遇一山崖險路絕攀援而上至山半饑餒
行且仆倚石歔歔忽見松下有物塊然遺于路視之
乃肉乾公噉肉吸泉復起行若有扶掖之者遠見胡
騎出沒恐爲所獲晝匿夜趨凡七日夜始達宣府會
御史張公昊按宣府開關納之旣見仆地移時乃甦
視其足有刺蒺藜百數而公不知也時都御史羅公
亨信爲巡撫來視公令人拔之竟日乃盡不能履臥
調上谷兩月餘始能起步

又曰時朝廷好寶玩中貴言宣德中嘗遣太監王三保使西洋獲奇珍異貨無算帝乃命中貴至部查王三保至西洋時水程時劉大夏爲郎公令都吏檢故牘劉公先檢得匿之都吏檢不得復令他吏檢公詰都吏曰署中牘焉得失劉公微笑曰王三保下西洋時費錢穀數十萬軍民死者亦萬計此一時弊政牘卽在尚宜毀之以拔其根猶追究其有無邪公聳然再揖而謝指其位曰公達國體此不久屬公矣陳建曰嗚呼土木之變文武冠紳死于虜者何限而

公與李文達白恭敏周莊懿蕭文昭諸公皆出一生
於萬死非諸公勲名事業有命自天幾何不爲無定
河邊骨邪又曰項襄毅坐困叛四可比趙充國之坐
困西羌而彭文憲商文毅主議不移不媿魏相朝
廷有人社稷之福也使當時叛四不殄而與套虜連
兵則誠可懼然則京軍雖往徒費餉搖人心何益邪

太保余肅敏公

事

景帝

裕陵

茂陵

公名子俊字士英青神人景泰二年進士歷戶曹郎
擢知西安府西安關中會府也民事戎務諸節鎮大
臣使車往來極冗繁難治公從容酬酢而上下皆孚
悅之西安城中水鹹民飲輒病公爲開新渠引山泉
匝徧城市人得戶汲至今便利號曰余公渠公又鑿
山開道瀉斥鹵灌田千有餘頃歷陞左布政轉副都
御史巡撫延綏延綏自正統中都督王禎鎮守榆林
未城也禎始城榆林及十八寨移鎮榆林尚未衛也

成化七年始置衛八年公請復廣榆林城增添三十六營堡盡補陝中伍籍之脫落及罪謫南戍子孫不能南風土者皆聽還伍以實榆林建學立官師擇其少者爲弟子員於是邊有城堡軍士得勤力以樹蔬果并開界石外地使興屯田歲得糧十餘萬石而榆林始爲重鎮矣東渡河連大同西接寧夏虜不敢復恣肆出入公又上疏言陝西有三邊延慶寧夏甘肅三邊之中延慶爲內地國初逐出北虜遠遁黃河外至正統初渡河犯近邊始於沿邊立界石創營堡築

墩臺天順以來虜知東西諸邊各據險以守難窺伺
唯延慶一帶地無險阻可以馳突屢來犯邊掠我邊
人爲鄉導遂知河套所在入屯其中自是虜額居內
而我列屯守禦反在其外臣以爲莫若干沿邊一帶
墩臺空處築爲邊牆立砦堡况舊界石一帶多高山
陡崖依山形隨地勢或剷削或累築或挑塹綿引相
接以爲邊牆實便報可於是東起清水營紫城砦西
接寧夏花馬池東西二千里每二三里間爲對角敵
臺砦連比不絕空處築牆如新月狀以偵敵避射凡

續通志卷一百一十九
堡十有二崖砦八百一十九小墩七十有八大墩一
十五自是虜寇益稀矣十二年移鎮陝西十三年入
兵部爲尚書公在邊日久熟知虜情及將校勇怯地
里險易遠近虜所出入故凡邊臣奏請從中調度輒
中機宜未幾致仕復召加太子太保改戶部公又能
知錢穀經費曲筭盈縮諸吏少年敏悟者皆自謂不
及也十八年又召公出總督宣府大同山西三關軍
務公言禦虜利用戰車條式奏上二十二年再出宣
大還京以左都御史致仕復召公爲兵部尚書公乞

致仕不肯出公平生仕宦多在西北故榆林修邊之功爲最已而入兵部出邊鎮欲推榆林法盡修大同宣府兩鎮邊牆而沮於讒忌功有緒竟不能就唯鎮榆林時怨謗紛起堅執不撓卒能成功垂利百世也公卒年六十一贈太保謚肅敏時羅山徐廷璋巡撫寧夏亦浚濠築墉繕亭障有功賞而鈞陽巡撫陝西亦大有名故稱關中三巡撫云廷璋由選舉

功低

都御史韓襄毅公

事

景帝

裕陵

茂陵

公名雍，字永熙，吳人也。弱冠舉進士，選授監察御史。尋奉命錄囚，碭山教諭丘純責膳夫丘磨兒。磨兒父教令逃去，因訴他御史純。純箠死吾子，他御史榜掠純，強自誣服，然無所得。屍黃河，撈一浮體，支解者，父廼哭吾兒也。于是純坐極刑。雍疑之，蹤跡得磨兒。純始白久之，出巡按江西。衆猶謂雍年少，未經事。雍抵鎮，振刷精彩，經措宏久。後先皆弗如也。廬陵饑，盜大起，雍從巡撫侍郎楊寧謀，設伏捕首虜三百餘。餘孽以

次伏誅。楊寧見雍，輒自失曰：「御史卽少而老，於吏是聰明，百寧何可當？」大學士陳循廬陵人，熟知雍才，言於上，擢僉都御史，代寧巡撫。雍時未三十，黜屬吏奸貪，䟽滯獄，均徭役，平市價，恩威大著。英宗皇帝狩土木，虜猖獗，西南夷繼叛，諸省無不被兵。獨江西恃雍少，安息。英宗復辟，下陳循獄，謫戍。雍坐調山西副使尋罷歸。一載召拜大理右少卿，復右僉都御史，協理都察院事。長院者寇深、剛愎，少許可，廼獨心敬雍。雍亦時時有所喻益。石亨誅錦衣指揮劉敬，坐直。

所邀亨午具用朋黨律罪死。雍抗言朋黨者阿比共亂朝政。今以一飯當之。恐過重。亨盛時大臣中固有朝夕趨其門宴會且累時。今不坐獨坐敬何也。敬卒不死。虜復寇掠內地。制詔雍巡撫大同宣府。陞辭賜宴及鈔。雍至則虜已遁。修戰守練卒固城堡爲一時北方之重。七年還議事。上喜公狀貌進兵部侍郎。諭南陽曰九邊撫臣宜得如雍者。南陽復薦山東按察使王越代公。越至見上。上又喜曰是真將官。英宗崩內閣學士陳文忠。雍因事間于大學士李賢。

左遷浙江叅政。雍爲叅政，頗不理省務。日選勝從賓客，曲宴西湖，賦詩自娛。純皇帝初，兩廣蠻寇復大起，拜都督趙撫征夷將軍，發湖湘閩廣土漢兵討之。兵部尚書王竑言于朝曰：「韓雍才氣無雙，盜事非雍莫可。」雍舊有過，請置勿計。於是使使就浙江拜韓雍左僉都御史，贊理諸軍務。雍卽日拜命，會衆議進取，或請分軍蹙賊入廣西可破。雍曰：「不然。古仗鉞臨戎，制閩外，謂利國家得專之也。夫兵有合爲正，分爲奇者。二廣地鮮完郡，大藤峽爲賊藪本也。諸軍不先薄

其本廼分兵以趨末分兵勢弱趨末難盡我全師至

其兵事如指掌

彼南可以攻大藤援高廉雷東可以應南韶西可以
取柳慶北可以斷陽峒諸路勢若常山蛇首尾互應
彼分而拒我聚而攻志曰先人有奪人之心茲行必
勝我奪之矣遂行會趙輔知雍才軍事一聽雍于是
督大兵分道進擊賊直抵大藤峽道有儒生里老數
百人跪持香曰我輩苦賊久矣今日幸遇天兵得生
爲良民願先三軍鋒雍大怒顧左右叱曰此皆賊耳
縛斬之左右初亦疑旣縛而袂中利刃出乃悉斷頸

散手足剗腸胃分掛箐棘中累累相屬賊大驚沮曰
韓公天威也遂破之前後斬獲四萬一千七十六有
奇捷上天子大嘉賞雍攻制詔卽軍中拜雍左
副都御史賜文綵幣六官一子錦衣鎮撫雍請以讓
其弟詔可雍復獻策二廣賊勢實相聯屬於是命
雍總督軍務撫鎮而下咸聽約束雍既得以便宜行
益修飭陣伍擇別將分捕窮黨與功最鉅進都察院
右都御史雍威嚴擬王公三司長吏見長跪白事促
縮如小吏軍門設銅鼓數千儀節詳密賓佐皆極一

時之選

鄭端簡曰公言自古蠻夷來寇不可以禮義較唯戰勝自戢叔敖云寧我薄人軍志曰先人有奪人之心薄之也兵貴拙速不尚巧遲於是衆從公會諸軍出東道遣徧將平陽峒諸賊又進平修仁荔浦諸峒遂直抵大藤峽奪其險塞焚其積聚四面夾攻斬俘四萬一千有奇盡降其餘黨斬其藤改爲斷藤峽置藤縣千戶所控賊出入刻石紀功班師四年公言嶺東西地廣山溪恐餘孽復作宜預爲彈壓請得文武大

臣分理六年，陞右都御史、總督兼巡撫，開府梧州。公得承制專決，盡法繩下，不貸大吏，以故謗議遂起。內臣黃沁忌公束縛不得肆，嗾人上書誣公。上爲遣使卽訊，公引疾乞歸。卒年五十三，謚襄毅。公洞達凱爽，篤於孝友，與人交有信義，不爲岸谷。臨戎蒞政，豹變鵬搏，雖發奸摘伏，而事簡心平。江西嶺南莫不畏如神明，愛如父母。摘詞洒翰，風生泉湧，天才逸發。逸史氏曰：雍稚少時多奇跡，至今鄉里能誦道之，近怪故弗悉。二廣士大夫每屈指雍曰：此百世功也。大

藤峽天險賊蟠據無敢窺獨雍及王守仁兩至之信然哉

布政陶公

事 茂陵

公名魯字自強鬱林人父成爲按察副使從擊賊兵
敗歿之 上旌歿事者贈官錄一子入冑監魯補焉
二十授廣東新會丞魯機明內蘊而神觀不足或從
令尉列見上官獨昏睡雖督榜不恤也大藤峽諸賊
亂二廣都御史韓雍總師討之檄魯隸麾下雍威嚴
擬王者二司長吏見長跪白事惴慄若不自勝一日
顧峒賊最強險難下者方設策魯時直膳侍左右漫
謂曰丞揣我何意魯曰得非某賊耶雍曰然丞能往

否曰匪直能且易耳。雍怒曰賊銳甚又搯阻自衛非大兵不可入。部下文武數百千人熟視無可當吾寄者。吾方欲身往安得易。且使若食粟能之耳。薨爾邑不能理乃言擊賊若妄。當笞魯不拜。抗言曰夫賊難攻者非賊難也我難其攻賊者也。謂魯解食粟不解擊賊者明公未悉魯也。蔣琬龐統廢邑事後乃爲蜀名臣公幸毋棄魯使得畢技當悉縛諸醜以獻。雍異之。改容曰若所將幾何而辦。曰三百人足矣。曰何少也。曰魯猶以爲多。兵貴精請任選擇。雍曰任爲之。

魯乃標式約曰有能力舉百鈞矢射二百步者來二軍之士十五萬人其比于式者得二百五十人曰未也請復下令募募數日足魯乃爲別將日操練陣法椎牛酒犒甘苦共之士爭願爲死率以先登大破賊斬首無筭賊穴所得士女金帛悉以分於三百人已無與者衆益奮韓雍大稱賞言于朝擢爲令累功進同知肇慶府事按察僉事副使左右布政使錄其後爲錦衣千戶魯前後任廣東所殺及降者二萬七千餘賊聞陶家軍駭慄遁避不及遇卽叩首乞爲良民

得無歿幸甚。然此三百人耳。服其心累。用不躋。語有
之一夫決萬夫避。况三百人乎。
逸史氏曰。士有遇有不遇。魯雖才。非韓雍。幾失魯。

功

太子少保程襄毅公

事

景帝
茂陵

裕陵

公名信，字彥實，休寧人。生於河間。正統七年進士。十年選給事中。吏科。景帝卽位，疏薦起薛文清瑄。虜犯京師，公監軍守西城。上五事。都督孫鏜禦虜西城失利。鏜急呼城門求入。公疏言鏜小失利，卽開城納鏜。虜益張，人心益危。趣鏜戰，必效死力。上立詔勿納鏜。虜逼城。鏜兵亦附城戰。公與都督王通、都御史楊善城上鼓譟，發鎗礮佐鏜。虜退。遂請勅石總兵于少保，移營關廂外禦虜。號令諸將。景泰元年，使蜀還。

廷議奉迎上皇有龔千戶者投密書高穀家言禮
宜厚語漸聞莫敢發公倡同列會䟽入明年上中興
固本十策又明年上脩德䟽陞公及葉文莊公叅政
山東山西公至遼東憂去六年服闋改四川理餉松
番天順元年入賀會錄景泰間進言者陞公太僕卿
公案故事理營衛馬三營大將石亨孫鏜曹欽並䟽
言太僕苛急請馬隸兵部太僕寺言高皇帝諭馬
數勿令人知今隸兵部馬登耗太僕不得聞卽有警
馬不給請以責兵部上是公言復歸太僕二年陞

僉都御史巡撫遼東建州酋董山通朝鮮受僞制爲
中樞密使公廉得僞制疏請先發伐其謀上爲遣
給事中使朝鮮錦衣譯官出建州董山匿不承出僞
制示之皆愕懼乞貢馬謝罪遼東總兵海寧伯董興
倚吉祥姻又昵都指揮夏霖恣不法分巡僉事胡鼎
發霖奸賊罪四十事公條上詔錦衣指揮郭英逮
霖籍其家英得霖貨末減霖寇溪遂劾公惑外臺官
瀆聖聽詔詰公不肯引咎徵下詔獄調南京太僕
少卿五年召還侍郎刑部憂去成化元年起爲兵部

侍郎當是時兩廣川陝荆襄諸路用兵獨署部區畫方畧皆中機宜先是四川貴州山都掌蠻叛兩鎮守將不相下兵久無功朝議遣憲大臣督戰科道官在軍中者忽告捷得賞未幾諸蠻又叛據大壩山箐險破合江上九縣三年進公尚書督軍與襄城伯李瑾發川廣雲貴番漢兵討賊公至永寧分大軍三道自督入金鵞池四川軍由戎縣貴州軍由芒部雲南軍由普市入期會大壩大軍進至李子關渡船鋪賊恃險拒敵飛梭下礮石如雨我軍發神鎗勁弩賊稍却

攀崖而上、順風舉火、焚其龍背豹尾二寨、賊退保大
壩、貴州已踦其後、四川雲南軍角其左右矣、賊驚散
不支、連破諸賊寨、斬首五千、擒二千餘、賊復走入天
井水磨二洞、洞竅幽暗不可入、窒洞圍守月餘、賊歿
幾盡、九姓土獠附賊、乘還師撲勦、又大捷、請移瀘州
渡航鋪、控諸蠻分山都掌故地、隸永寧芒部、更大壩
爲太平川、立長官司、轄熟夷、論功兼大理卿、言官論
公上首虜不實、公四疏請老、不允、七年春、無雨雪、公
應詔條闕政、言兵事可更張者四、兵弊可申理者五、

其大者延綏兩廣歲遭殺掠邊以捷聞朝以捷賀上下相蒙戎夷益肆四方流民盡聚荆襄不早區畫變起中土天子六師馭輕居重京營士馬疲耗器甲頓朽非大更張綏急可憂是歲改南部叅贊機務公曰叅贊謹非常有司事非所預八年合南都大臣言興利除害三十餘事乞召還給事中王徽劾退南京守臣應城伯孫繼先明年致仕又明年卒贈太子少保謚襄毅以功得世錦衣百戶先是虜久據河套中議遣大同守將楊信將兵十萬搜套公執不可公征

南蠻制詞官殺皆得專斷、迄班師、不敢賞殺一人、曰
刑賞 天子大柄、顧閫外事不易集、假大臣束攝人
卽幸事集、輒自專、非分也、

○侍郎葉文莊公

事

裕陵

景帝

茂陵

公名盛字與中崑山人正統十年進士授兵科給事中已巳之變率同列請誅將臣扈從失律者然後練兵選將誅虜復讐一日三疏虜退請明賞罰言效勞如孫鏜死事如謝澤韓清宜賞以示勸守關不嚴赴難不力不可不罰以示懲陞都給事中監守城兵劾于少保德勝之捷時北虜方張大臣有奏留邊兵守京師者公言今日之事邊關爲急往者獨石馬營不棄則六師何以陷土木紫荆白羊不破則虜騎何以

薄都城邊關不固縱守京師不過保九門耳急宜固守宣府居庸便會河南陳州流民聚爲變勅公往視稍解散得安輯景泰元年春還朝䟽進沒名書請迎駕者留中三年遷山西右叅政督宣府軍餉尋以李秉薦協贊獨石諸城守備都督孫安軍務獨石馬營八城被虜殘毀列上利害可興革八條又設暖鋪便行旅均蔬圃給將士贍死扶傷纖悉備具又請官銀五十兩買牛千頭摘戍卒不任戰者屯田給軍中諸費七年外艱去天順二年召爲右僉都御史巡撫兩

廣請令鹽商入米餉邊與都督顏彪破賊砦八百所
斬首萬級八年移鎮宣府代李秉修建屯堡虜至烽
堠輒發不得掠人畜公在兩廣時丘文莊不喜公以
故李文達亦惡公遂有謗公殺降至斥公勞擾嶺南
者成化二年文達卒上欲得人入內閣勅王忠肅
公慎簡內閣忠肅公薦柯潛萬安劉定之吳節及公
五人上用定之四年陞公禮部侍郎五年改吏部
六年賑畿內八年北虜入河套議增兵設險或請大
舉搜套驅虜出河外沿河築城堡抵東勝徙民耕守

其中勅公往議方略上言搜河套復東勝未可輕議

此等事要量彼已夏挂州之禍坐不自量也

唯增兵守險可爲遠圖宜令守臣剗削邊牆增築城

堡收新軍以實邊選土兵以助守便上從之九年

轉左侍郎未幾卒年五十五謚文莊公博學宏才清

脩苦節每稱慕范希文惜其未獲柄用當是時慎舉

諫官如公及姚夔林聰尹旻張寧輩皆其選也尹嘗

問張宣德以來科中人物誰第一張曰季聰尹曰季

聰何敢望與中

太師馬端肅公

事

景帝
泰陵

裕陵
康陵

茂陵

公名文升字負圖河南鈞州人生而有異兆貌瓌奇
多膂力嘗與羣兒戲十數爲羣角之靡不仆年二十
六登景泰二年進士吏部尚書王直異其材選授監
察御史時領院事者王文王翱皆嚴重鮮可而獨以
文升爲國器出按山西再按湖廣所至發奸摘伏有
神君之稱還領全臺章奏以母憂歸服除超拜福建
按察使鎮守中貴人虐而肆獨文升能制之使稍稍
斂戢進南京大理寺卿丁父憂成化初固原土夷滿

四與其黨劫其從子指揮璫據石城以叛陝西巡撫與中貴人將討之大敗復合寧夏延綏兵討之又大敗詔逮巡撫諸臣下獄而卽家超拜文升右副都御史代爲巡撫佐總督都御史項忠率京邊諸軍五萬討賊文升馳急傳十日至陝時兵已發則簡練其留後者申約束通轉餉五日而嚴馳至軍偕項忠屯中路文升言於項忠使盡焚城傍草斷汲路賊始稍稍困石城潰先後俘斬首虜七千六百有奇獲其男女老弱二千六百捷聞進文升左副都御史賜金帛

遂疏言時事十五條及禦戎三策上皆嘉納進提督甘涼寧夏三鎮軍務虜寇臨鞏文升遣兵逐之至黑水口破擒其平章迭列孫虜復寇韋州深入至好水川文升復縱兵破之於湯羊嶺斬首積級至二百餘獲其馬牛羊輜重不可勝計名其嶺曰得勝坡勒石以紀遂進兵平岷州叛番獲其酋首文升有所奏捷不爲夸張中亦無主之者以是報賞薄久之始入爲兵部右侍郎三品滿九載僅予二品祿俸仍出飭薊門以東至遼左邊備文升嚴汰其弱弗堪者而製

五花營八陣圖教之使習皆爲精兵還進左侍郎時
陳鉞等後文升爲巡撫多訶伺將吏小罪輒逮逮輒
罰馬而釋之將吏旣怨且狎法而馬價亦踊貴文升
上邊事十五條因及之鉞以是銜文升時海西衛都
指揮散赤哈移文訐驗夷管指揮受夷人真珠豹皮
官爲究管指揮管懼賂都督產察使繫笞散赤哈恨
之乃率所部十餘騎稱入貢欲以面聞鉞而守將以
非所入貢道却弗納散赤哈益恨過經女直建州三
三衛以朝廷昔誅董山詵不平因留散赤哈聚兵

得數千騎大掠鳳集諸堡獨近塞者僧格等十八族
皆以有使貢恐誤中兵而留其使走之撫順所白狀
鉞方欲自解與副帥韓斌謀置之獄而夜掩屠其族
殆盡更奏搗巢捷且請大兵議勦撫太監汪直志方
銳欲自往爲言上遣太監懷恩覃昌等詣內閣召
六部議萬安等相顧莫發兵部尚書余子俊言虜使
入貢而掩屠其家何以爲中國恩太監曰撫之乎曰
撫之則以一大臣偕大通事往足矣文升疾應曰善
懷恩入白之上卽傳旨命文升偕大通事詹昇往

勘直不得行，恨文升。文升至，乃盡赦其被屠家餘衆，數百人，撫以好語，給以布粟。而海西與三衛亦來聽文升察其意不實，乃具言狀而行。諸路伏兵以待，俄復入寇，伏兵發，斬首二百餘級，生擒數十人，鹵駝馬稱是因以兵威諭都督產察懼，悉請歸命。而汪直必欲自出，出至遼左，而事已定。文升與議，切勿用兵。直亦陽聽，而中不善，又銜其敵禮，空手無饋遺，而陳鉞則飭厨傳盛供，張見卽叩頭，便辟左右，僣從皆有賄。於是遂相與謀傾文升矣。文升竣事歸，賜綵幣、羊酒。

理部事如故。然直則以密疏言。文升禁不與易農器。故屢寇塞也。於是復遣直偕刑部尚書林聰往勘。則竟如直言。遂下文升詔獄。文升言實禁鐵器。非農器也。汪直既陷。文升使謫戍重慶衛。以去。則偕陳鉞大發兵破諸屬夷。鉞拜賞賜。傾府庫已而皆敗。十九年起文升爲左副都御史。巡撫遼東。士卒聞文升復至。皆鼓掌喧舞。蓋文升至是凡三渡遼矣。故東人至今思之。亡何進右都御史。總督漕運兼巡撫鳳陽等處。旋入爲兵部尚書。文升念天下方困於兵。會貴州

都勻苗叛、守臣請合三鎮兵遣討。文升不可，惟遣官
勘處，卒無他也。時上幸方士李孜省，欲有所薦引。
代文升忽有中旨，調文升南京兵部尚書，叅贊機
務。孝宗皇帝立，召改都察院左都御史。上躬耕
籍田，旣宴而教坊以雜伎進，出褻語。文升正色曰：「汝
曹第陳農家作苦，使新天子知稼穡艱而已。」褻語
何爲？公卿愧之。文升乃復條上十五事，上皆爲嘉
納。特命提督十二團營兵馬，掌院事如故。時子總以
鄉貢士待選，文升使請外曰：「必大臣子而京秩，誰當

外者尋復爲兵部尚書京師大水上䟽陳時事於貴
幸多所侵又嚴覈六軍諸校斥其貪黷選愜者三十
餘人以是有怨家夜持弓矢警文升門又飛書射入
東長安門內事聞上嚴令錦衣官校緝訪而給金
吾騎士十二出入爲文升衛文升因乞休優詔不
許屬文升有小疾而虜小王子以數萬騎駐大同邊
外勢洶洶上使中貴人挾醫視文升疾賜上尊餽
餽因問計文升謂此虜方敗于他部勢已絀無能爲
也請密爲之備而揚聲逼之虜果徙去安南侵奪占

城五州地。詔勒還之。數支吾不服。會二國各入貢。乃請面折諸廷。安南詞服。因諭以恩威利害。厚賜之。歸還其侵地。廣西土守岑欽與侄溥相讐殺。巡撫欲討之。文升不許。第令騰書戒飭。已皆悔悟。納款請死。時南畿浙江大水。河南山東山西陝西旱。文升請亟勅撫臣發庾以賑。遣使崇祀羣神。爲民祈請。馬政弊甚。民苦孳生寄養。請覆覈減定其額。著爲令。特加太子少保。久之。又加太子太保。有旨傳陞。盡工張玘等二十七員爲錦衣千戶。文升力諫。謂此先朝弊。孔

賴上初室之今復啓之無功而冒武職徒使邊將
解體也江南歲侵有司請募民入粟授以指揮等官
文升復諍以爲授之指揮亦能使邊將解體只宜授
散官上皆爲停哈密忠順王者故元遺孽文皇
帝寵其王予金印使率其民城哈密居之以通西域
貢道其位高而兵最弱忠順王歿王母當國爲土魯
番酋鎖檀阿力所擒鹵人畜併奪金印去鎖檀阿力
歿子阿黑麻立以金印歸我文升請以王母之甥陝
巴爲忠順王填之阿黑麻怨我賞薄謂陝巴賤種也

何得王哈密復輕兵入虜陝巴及金印去而使其驍將牙木蘭以三百騎入守文升奏請執阿黑麻之貢使寫亦滿速兒等四十餘人流閩廣而薦都御史許進撫甘肅使率副將彭清等選番漢兵倍道而至夜坎城登破之斬級六十降自保者八百人牙木蘭以千里馬走謁阿黑麻阿黑麻方與赤斤蒙古衛相讐攻不能大發兵使別將將輕騎五百圖復哈密復爲赤斤衛兵所微殺乃遣使上書謝罪請歸陝巴及金印於是文升亦奏還其貢使酬以少金帛而哈密復

皇清寧宮災 太皇太后 皇太后同居仁壽宮

當時大臣能悉心謀國不拘拘職守也

上命文升與工部亟議修建文升言團營軍徫於役不可復苦楚蜀災不勝採伐三敞有儲木尚可材太僕馬惜薪薪其價可以資工匠木石費倘不足則幸發內帑金數萬足之故落成而公私不告匱 皇太后徙居懽甚予文升一子錦衣百戶賜錦幣優等北虜火篩大入邊殺掠吏民 上憂之召對便殿賜酒饌給筆札詢以戰守之策虜雖訐竟不能深入而會吏部缺尚書卽首推文升給事中亦言吏部非文升

不可乃用倪岳而特加文升少傅十四年岳卒文升
乃爲吏部尚書明年加太子太傅十七年上召文
升至暖閣諭之曰明年天下覲吏畢集卿其用心採
訪大彰黜陟文升頓首曰陛下圖治若此宗社之
福也上乃令中貴人掖文升下階後至考察京僚
給事中吳舜王益自以躁妄當斥因先事誣文升及
都御史戴珊欲兩持以解文升曰吾安可市名而廢
法乎悉署去之滿九載加少師兼太子太師上崩
梓宮當出德勝門文升徒步號哭二十餘里不稱疾

武宗立吉凶之費計黃金五千兩白金百八十萬兩戶部計無所之欲裁諸王賜併借公侯勛親莊田租課文升言人主卽位例推恩恩未下而先奪之非禮也御馬監太監王瑞謂造大婚禮器物應用儒士李鼎等七人楷篆西天西番字已得請矣文升力持之曰此曹皆昔考察無行且不良於書今復用之何以杜倖門乃別選八人以進瑞慙恚誣文升抗旨文升因乞歸不許當是時幾已內移而文升居位久左侍郎焦芳日夜覲之會楚人熊繡爲兵部左侍郎

文升推出兩廣總制，不欲行。流言布聞，其同鄉御史何天衢因劾文升衰老。文升二十一疏乞歸，乃報許。而御史王時中又謂兵部尚書劉大夏、刑部尚書閔珪謀代文升，故爲文升劾大夏。珪二公去，二公皆賢。旣相繼去，而焦芳坐得文升位矣。文升之去，人主尚優禮，賜勅予寶鏹錦綵，馳驛以行，月給祿米六石，歲給人夫八名，供帳傾都。又三年，焦芳構于中貴人瑾，削文升官秩。正德五年卒，年八十五。明年瑾誅，芳斥，復贈太傅，謚端肅，予祭葬。嘉靖初，加贈特進左柱

國太師文升之卒無幾而大盜趙鋌亂河南行剽至
釣州以文升家在捨弗攻攻破泌陽前大學士焦芳
已跳匿燬其家發芳篋取其衣冠縛葦若人者而屠
裂之曰恨不爲天下殺此賊。

少保秦襄毅公

事

景帝
泰陵

裕陵
康陵

茂陵

公名紘字世纓單人景泰二年進士初爲南京御史有風裁劾中官降北黃驛丞御史陳綱薦知雄縣禁中官捕獵被誣得禍幾不測民數千走擊登聞鼓訟寃得宥調知府谷縣陞知葭州調秦州成化中爲鞏昌知府十三年陞陝西叅政有軍功坐事調廣西十八年陞僉都御史巡撫宣府破虜柴溝堡及巡撫陝西時秦府旗校肆橫悉擒治不少貸王訐公凌親王茂陵怒逮公詔獄命內臣尚亨籍其家得黃絹一疋

故衣數事。亨還言公貧狀。上親閱其貲嘉歎良久。
立釋公。且賜鈔萬貫。旌其廉。巡撫河南時。會汪直至。
他巡撫率屈禮公。獨與抗。密疏直多帶旗校擾地方。
直還。上問各省撫臣賢否。直獨稱公廉能。上出
公疏示直。直頓首伏罪。益稱公賢。弘治三年。以右都
御史總制兩廣軍務。破岑欽。鷓鴣嶺走匿泗城。遂克
田州。又破海南黎及瀧水後山賊。四年。劾總兵安遠
侯柳景貪不法。逮景下刑部獄。追賊鉅萬。褫其爵。景
得內降。減賊。因摭他事誣公。亦被逮。坐免。臺諫交章。

論救。上報聞。三原在吏部。極言公廉直忠信。不可棄。內批。南戶部尚書黃紱改南左都御史。公代紱。南戶部尚書八年。乞致仕。不允。十一年致仕。十四年。虜報急。以王忠肅馬恭襄故事。召公。戶部尚書兼憲職。巡撫陝西十五年。總制陝西三邊軍務。整花馬池鹽課。買馬。開豫望城屯田。先後斬首九千。修城堡。關。窖。一萬四千所。剷山崖。三千里。十七年。乞致仕。不允。加太子少保。是歲革總制。召還。部辭得致仕。十八年年八十。卒。贈少保。謚襄毅。公剛毅廉介。歷官四十餘年。

提兵南北列位孤卿所居僅蔽風雨妻孥菜羹麥飯
不改其舊逆瑾專政時公義兒丁玉與公繼妻弟楊
瑾爭訴楊瑾因誣公子畊有資萬計逆瑾喜卽籍公
家無所得

太子少保鄧襄敏公

事

景帝
茂陵

裕陵

公名廷瓚字宗器巴陵人景泰五年進士爲淳安知縣問民疾苦專施惠政不求赫赫名終九載無知者兵部尚書張鵬時以都御史巡撫薦知梧州會母憂去貴州程番府在萬山中夷獠雜聚難治公知程番悉心規畫凡城郭街衢廟宇廨舍以次興建榜諭諸夷使受約束政令公平莫不感悅墾田不踰界入市不二價四境晏然蔚如中州後巡撫貴州適黑苗久叛勅公往視兼提督軍務初撫不從始合衆謀調兵

食、決策征勦、兵至其地、號令嚴明、將校用命、斬首六千、獲二千、械首惡、俘京、奏言都勻、清平、舊設二衛所屬九長官司、其人世祿驕縱、稔惡釀患、致夷人侵田、奪貨已四十餘年、軍疲於戍、守民困於轉輸、今幸黨惡消除、非大更張不可、條上十一事、下兵部議行、始設都勻府一、獨山、麻哈州二、清平縣一、更設流官、與土官兼治、以右副都御史召入臺、未幾、出鎮梧州、兩廣自成化初、韓襄毅平寇後、開府梧州、率以憲臣有才望及官高者、總督軍務、兼巡撫、公性不瑣瑣、益思

安靜屬吏有賢者輒薦舉或不職特去一二太甚者
顧羣蠻以劫掠爲常往往出沒閩楚諸郡公言都御
史金澤巡撫偏方非宜宜以江西一省付澤使二司
聽節制庶軍馬錢糧可以調度至於湖廣衡州設兵
備憲臣遷治所郴州便又以廣東瀧水爲賊巢宜卽
其地設千戶所調軍守禦仍宜給隙地屯種爲久計
公於羣蠻結以恩信兵不輕出出則成功若鬱林川
雲鑪大桂諸種作亂以次討平其後四會諸下縣饑
盜竊發勢尤熾公斬獲首惡李景光覃潔及其黨二

百餘人、餘悉解散歸農、卒贈太子少保、謚襄敏、兩廣總鎮、又有桂陽朱英、正統十年進士、初爲御史、禦賊葉宗留處州、劾外戚汪金、內臣善增、陞廣東叅議、葉文莊公、每事詢英、叅政陝西、調兵食、征固原、巡撫甘肅、條邊事、陞兩廣督撫、專意安輯、民得休息、流人復業者十五萬家、出入十年、召入臺、加太子少保、卒贈太子太保、謚恭簡、英性度宏暢、才識通敏、剛介而仁恕、所至有惠政、

太子少保童公

事

景帝

祿陵

茂陵

公名軒字士昂故鄱陽人父碧瑄以精天官學占籍
南京欽天監公幼穎敏讀書過目成誦以景泰辛未
進士拜南京吏科給事中公思舉職深居簡出不妄
與物接嘗上疏言省冗員公考察倡武勇擇師儒杜
倖進恤京民又言南京糴貴民饑請命官賑之俾御
史體察多見採納時詔南京守備採辦翠毛魚鮓
諸物以萬計公極言止之英廟復辟覽公奏嘉其
敢言尋上疏言弭盜安民數事尤切時弊天順己卯

以嫡母艱歸服闋改戶科給事中癸未同考禮部會
試得倪公岳輩十數人時稱得士憲廟踐阼公首
上疏言帝王之治當知本末隆聖德用賢木納忠諫
愛小民謹邊備本也而簿書刑名其末也願時引儒
臣講求祖宗謨訓及古帝王脩身用人之道推而
行之則聖德隆命在廷三品大臣歲舉堪任方面一
人且嚴連坐之法進用大臣亦召三品大臣於便殿
各舉一人不當者科道糾之則賢才用臺諫之言賞
其直貸其過則忠諫納養民之政在戶部凡奏報災

傷卽加優恤則小民安多方求將歷試所長文武有
犯輸粟于邊則邊備謹上優詔褒美並下諸司舉
行之公又言漕河爲官舟所阻請命大臣督其事仍
乞省貢舟而嚴禁之未幾四川盜作命公往撫公
至遍歷賊巢宣布恩威諭以禍福賊首王應高等聞
公名羅拜乞生悉慰遣之夏六月進都給事中會賊
首趙鐸悍不聽撫旋復叛去公偕鎮巡三司分兵勦
捕躬冒矢石斬獲無算凱還蜀人繪班師圖紀焉明
年夏四川巡撫言賊復猖獗委咎于公且議出師公

日賊已平。奚用出師。不數日捷奏果至。猶坐言者。謫
浙壽昌令。已丑入覲。上䟽自理。廷議以爲寃。於是宗
伯姚公薦改公僉事。督雲貴學政。公精于考校。隨才
造就。士風爲變。按臣交章薦公。召拜太常寺少卿。掌
欽天監事。公嚴考天文諸生。公僚屬之薦省曆紙之
費。夙弊一清。已亥夏。進太常寺卿。仍掌監事。教諭余
正已奏言曆法之差。上命公與之考論。不合。公上
言。歲差置閏。其來已久。我朝考曆制象。尤爲精密。雖
日月薄蝕。不無先後畧刻之殊。分秒多寡之異。則以

土有南北高下故耳。正巳乃謂天地有自然之冬至。以至朔望置閏皆非人力可爲。是不知古人以數求天之術。顧以小智亂成式。宜下之吏以正其妄。從之復正天下陰陽官納粟免考。非制。癸卯春。予告歸。日。日蕭然一室。非知舊不輕接納。縉紳重之。弘治改元。會欽天官以不職罷。衆復以公薦。命公仍掌監事。夏六月。日有食之。公言日食紀元之初。當盛夏火旺之候。宜脩身窮理。進君子退小人。以謹天戒。尋辭掌天文舉。吳昊張紳高鍾自代。是冬進右副都御史提督。

松潘軍務兼巡撫時蜀歲侵公首舉荒政設粥以待饑饉給糧以歸流移平訟以決久禁先是久旱公至雨亦隨足乃爲禁令三十餘條皆安邊保民之政復以南路鎮番一帶苦蠻夷出沒歲減軍糧備犒賞非計奏以四川官帑銀布代之戎卒乃安公復以其地險遠蠻夷雜居疏言松茂威疊戍守甚艱而疊溪一路尤甚宜調兵設衛令一都指揮守之四處要路各設一倉以便轉輸令一布政司官督之復言沿邊衛所州縣皆在萬山中關堡與蠻夷共有害而無利宜

捐松茂中羊腸一線之路、則關堡倉廩可減、兵無遠
戍之勞、民省轉輸之苦、蠻有坐困之機、凡八害三利、
畫一以聞、事下所司議行、嘗創兵器、給諸關堡爲禦
敵具、薦按察使林俊可任中丞、時論黜之、辛亥、晉南
吏部右侍郎、甲寅、夏、進南禮部尚書、累疏乞骸骨、

上再四勉留、公力陳數千言、謂朝廷大政、闕門一議
不足決是非、宜如古公卿大夫各得獻議、以俟采擇、
未幾以疾卒、贈太子少保、公身若不勝衣、強學好問、
至老不倦、爲文淵博、雄麗詩有唐人體裁、書學遒勁、

見者寶藏之性孝友事嫡母夫人備極色養分祿以
贍兄嫂撫姪靈及諸孫應禎皆有恩平生喜賑人之
急而自奉蔬食水飲泊如也顧司寇璘作鄉正篇以
訓士云公擇地而蹈擇言而出吐辭濡翰必軌其方
慎哉愿乎君子以爲知言所著有清風亭藁枕肱集
海岳涓埃諭蜀藁籌邊錄夢徵錄各若干卷藏于家

尚書何文肅公

事

景帝

裕陵

茂陵

泰陵

公名喬新字廷秀廣昌人景泰五年進士父文淵進士嘗知温州府廉靖平恕召入刑部爲侍郎請告歸正統中薦起吏部侍郎景泰中進太子太保佐王直同爲尚書被劾致仕去公初主事南京禮部歸葬父卜地不得吉會宋樞密陳文定公葬父廣昌子孫貧欲粥其葬地衆謂此吉壤公曰暴人父而葬吾父吾不忍爲按察副使福建陞河南按察使諸貪殘吏倚強援莫敢詰公盡鑄暴坐法去撫戢南陽山谷流民

六萬戶陞布政使湖廣成化十七年副都御史巡撫
山西督三關兵事虜自河曲入塞急遣伏兵灰溝旁
斬虜大敗去召入刑部左侍郎虜酋擁衆寇大同殺
邊將紫荊居庸告急勅公巡邊遣諜覘虜營聲言遣
兵搗其巢虜懼不戰遁去播州宣慰使楊輝嬖妾乃
寵其子友欲奪嫡子愛諸小酋不肯從輝矯奪大壩
鎮筓諸夷寨立懷遠宣化二長官司又割播州凱離
五十二寨設安寧宣撫司立友爲使張都御史輒爲
輝畫請得旨會愛母死友母益橫誣愛反交通唐王

朝廷疑愛遣公卽訊友母子又輦金寶賂諸權貴人欲公囚愛衆籍籍爲友遊說必欲去愛公至盡得友子母奸惡罪條上曰愛無反謀革友宣撫削官銷印遷保寧與產業自給播州遂定陞南刑部尚書疏奪內臣守備蘆洲還民

泰陵初召公刑部爲尚書上疏乞禁京師胡服胡語鄒御史者鹵橫欲躡得大理丞公薦曲阜魏紳郎中鄒御史恨公會公外氏與鄉人訟卽誣公得金錢與行賂輒上下其手要地人又從中主之公杜門引咎

辭位下諸根連人詔獄窮治無踪跡公雖湧白竟不
安其職請老去公卿臺諫交薦起公竟不得卒後江
西巡撫林俊論公文行政節應謚法得謚文肅公守
官清慎律已方正事無難易夷險不避嫌怨必行其
志

都御史高公

事

景帝

裕陵

茂陵

高明字上達，貴溪人。景泰二年進士，爲御史，巡河南。糾斥不職吏六十餘人。會黃河南徙，民耕淤地，畝收歲數斛。議者欲履畝坐稅，公不可，曰：「河徙無常，稅額不改，平陸忽復巨浸，常稅猶按舊籍，民何以堪？」天順四年，御史趙明等疏劾來朝吏語觸上怒，詰疏出誰公。任寔草疏，都御史寇深言累年奏牘皆屬高明，乞貸明過。上怒亦解。顧喜公曰：「高明能御史，先是公劾兵部尚書陳汝言怙勢納賂，獄死。汝言潼關。」

人代于少保爲尚書不數月奸贓萬計誅石亨公及
門達籍亨家公言亨無反謀蒼頭得免死者百人鹽
山薦陞山東按察使上謂南陽曰高明宜內用又
謂寇深曰高明可都御史南京南京久弛縱公振綱
紀劾罷諸貪殘吏揚州鹽寇起守兵失利勅公勦捕
公造巨艦榜籌亭往來江南北督戰又授方略御史
戴琥顧以山擒賊九百餘人並江置邏堡高山望候
賊出沒露踪跡不得逞江海間稍靖中官粥私鹽縛
儀真指揮羣卒大閱公盡籍其鹽劾中官又條劾戶

部及諸巡撫縱法狀及陳利害十餘事衆始忌公公亦三疏請終養成化二年上杭賊起卽家賜公勅便宜討賊公力疾赴閩先諭撫賊降賊恃險不應進兵搗其巢大破賊俘四百人誅其渠魁十一餘並輕坐析上杭溪南里爲永定縣控賊海口民矯令募亡命謀不軌公不欲再起大獄或至用兵坐誅妖言衆遂定卽上疏乞休納符勅去嘗曰孔殽三宜去司空圖三宜休吾無才一宜退有病二宜退親老無兄弟三宜退及治盜徵宜再起賊平疾作宜再退自稱五宜

居士。公天性孝直俊暢有通才難進易退出處皦然